

EKALESIA FAAPOTOPOTOGA KERISIANO I AMERIKA SAMOA  
**OFISA O A'OA'OGA KERISIANO**



**VASEGA MATUTUA**



**Ianuari - Iuni**  
**2020**

## MANATU MO FEPUARI: “FAITAUGA O LE TUSI PAIA.” (READING THE BIBLE)

FEPUARI 02, 2020

**MATAUPU 1:** “O tagata uma ia pepese ma le Atua o Fatuga.”

(All human shall sing with God of ‘Poetry.’)

**TUSI FAITAU:** SALAMO 1: 1 - 6

**SINI:** Ia iloa e le fanau e ao ona pepese tagata uma ma le Atua o ‘Fatuga’.

**Fesoasoani mo faiaoga:** E tu’u atu pea le sa’olotoga e amata ai le vasega i le silafia o lau susuga le faiaoga ma la outou ‘au-faigaluega. E fa’amoemoe atu foi i la outou tapenaga, tainane le faitau mae’ae’a o le tusi faitau ia feso’ota’i ma le mataupu. Ia mua’i malamalama lelei lau susuga a le faiaoga i le uiga tonu o le mataupu, aemaise le feso’ota’iga ma le tusi-faitau. Ia lava lou iloa i upu ma o latou uiga o i totonu o lenei lau-Salamo, e faigofie ai ona malamalama i ana fatuga.

**Tauloto:** E ao ona tauloto atoa lenei lau Salamo 1: 1 – 6 mo le vasega Matutua.

### **Fesoasoani mo le Mataupu:**

Ia fa’amanino muamua o le matāfaioi tausi lava lea mo tagata uma na faia e le Atua, o le si’i atu o vi’iga po o le pepese atu i le Atua. O se isi fa’aupuga, o le galuega ma le tiute tauave o so’o se tagata, ia pepese ma vivi’i atu i le Atua e lē aunoa. O le Salamo 1, o lo’o ta’oto ai le finagalo o le Atua mo le tagata, aemaise o ana fatuga e fa’atatau i le tagata amiotonu. E ui o ‘upu’ vivi’i a le fai-salamo, a’o fatuga ia ua saunia e le Atua mo le tagata amiotonu aemaise le ola fetalia’i ma le foafoaga atoa. E pei o upu a le fai-Salamo, a’o fatuga mai le Afioga a le Atua ia.

Ia malamalama lelei le fanau o le tasi foi o natura o le Alii o loo tatou tapua’i ai, o le Atua o ‘Fatuga.’ O lona uiga o Le e fatu-pese ma fatu-solo i le soifua o le tagata ma lana foafoaga. E pei o ‘Upu’ a le Fai-Salamo o lo’o i le tusi faitau, a’o mea lelei ma le matagofie na faia ma saunia e le Atua mo tagata uma e ao ona pepese atu ai. E ui o lo’o i ai tusitala o le Tusi Paia, peita’i, o le Agaga o le Atua o lo’o tusia lenei galuega tele pei ona molimau le ‘au-popoto o le Feagaiga Tuai. O le uiga o le manatu o le Atua o Lē óu ‘Fatuga’ o lo’o pese ai le fai-salamo i lenei taeao, ina ia tatou pepese fa’atasi i ona vi’iga ma malamalama i ana fatuga mo le tagata ma le foafoaga.

### **A’oa’oga:**

- O le Atua e fa’a-ámuia i le tagata amiotonu.
- O le Atua e fa’amasino tonu i tagata uma.
- O le Atua e fa’aolaina le tagata amiotonu.

E tele nisi o a’oa’oga o lo’o ta’oto i lenei tusi pei ona faitauina, ae manaia foi pe a fa’aopoopo e lau susuga nisi fautuaga e maua mai i ‘Fatuga a lo tatou Atua.’





**MANATU MO FEPUARI: “FAITAUGA O LE TUSI PAIA.” (READING THE BIBLE)**

**FEPUARI 16, 2020**

**MATAUPU 3:** “Alofaaga ma mo’omo’oga lelei: Tusiga i le Atua o nu’u.”  
(Love and best wishes: Writing the God of community.)

**TUSI FAITAU:** ROMA 16: 1 - 16

**SINI:** Ia iloa e le fanau le tāua ma le fa’amalosiau o alofa’aga ma mo’omooga mo le ‘au-faigaluega totofi o le Talalelei.

**Fesoasoani mo faiaoga:** Ia maitauina alofa’aga ma mo’omo’oga o le Aposetolo mo le ‘au-faigaluega na latou galulue, ua ta’ua o le ‘au-paia, a’o tuafafine ma uso i latou i lā le Talalelei. O valevale alofa o Paulo e pei o se molimau ola i le soifua, a’o galulue ma i latou i le galuega i nu’u ese. A manatunatu lelei i o latou igoa, e lē o ni tagata tauāloa ma amanai’aina, peita’i, o i latou lava o le ‘au-faigaluega a le Atua. E ui ina lē o ta’ua tele ni mea e iloga ai nei tagata pa’ia i le galuega, ae pei o se tusi ‘au-alofa ma tau-māvae a Paulo ona o lo latou fesoasoani ane i le galuega pei ona feagai ai.

E tali fa’apea se lagona o le aposetolo mo le ‘au-faigaluega a le Atua, e lē manatu tele i o latou igoa a’o se sao mo le Talalelei, ona fa’amauiua lea o igoa mo alofa’aga ma mo’omo’oga. O lā Paulo, “e lē o se mea fa’alē-aogāina lo outou tautigā i le Atua ma lana galuega, e tau i le manuia e fa’avavau.” E silasila ma fa’afofoga le Atua i le alaga a le tagata galue ma le fa’amaoni, auā foi e mulimuli mai galuega a le tagata iā te ia lava.

**Tauloto: Roma 16: 16; “Ia outou fealofani i le feāsogi pa’ia. O lo’o alolofa atu iā te outou ekalesia a Keriso.”**

**Fesoasoani mo le Mataupu:**

- E manaia pe ā fai se lisi o tagata o lo’o ta’ua e Paulo i lana tusi na faitauina. Pe mafai ona tu’u fa’afeagai ma mea na latou faia e pei ona aumaia i le mataupu.

- E ui ina tele so latou aogā i le galuega a Paulo, peita’i, o ona valevale alofa ona o le fa’amaoni.

- E pei o se tusi a se tagata e lē toe foi ane i le mafutaga ma i latou. E pei o se tusi fa’avavevave a’o se fa’afetai fa’alē a’ua’u mo le ‘Au- Paia ona o le galuega o lo’o fitā-i-tuga i ai.

- Ia mautinoa lenei manatu e le fanau; ‘aia nei tatou galulue mo se tau’, o ā tatou galuega o lo’o silasila fofoga o le Atua i le tagata ma lana o lo’o faia, e maua foi le manuia e fa’avavau.

**A’oa’oga:**

- E manatua pea le ‘au-faigaluega, ona o ā latou galuega lelei na faia mo le Talalelei.
- E ofoalofa ma avatu mo’omo’oga lelei mo le ‘au-paia ona o lo latou sao i le galuega.



## **MANATU MO MATI: “MEA LILO O LE MALO.” (SECRETS OF THE KINGDOM)**

**MATI 01, 2020**

**MATAUPU 4: “O le Malō o le lagi.” (The Kingdom of Heaven.)**

**TUSI FAITAU: Mataio - 19: 1-15**

**SINI: Ia iloa e le fanau e i ai mea lilo i le Malō o le Lagi, na o i latou e talitonu ma le fa’amaoni e fa’ailoa i ai e le Atua.**

### **Fesoasoani mo faiaoga:**

Ia manino le fanau i mea lilo o le Malō o le Atua, e tele ina lē fa’ailoaina ia mea lilo i ta’ita’i, le ‘au-Iutaia, le ‘au-faresaio ma le ‘au-tusiupu aemaise i latou o e fa’atu’i ’ese i le talitonuga fa’a-Kerisiano. E ao ona fai sau fa’ata’ita’iga po o ā ni mea ua ta’ua o mea lilo. O mea natia mai le iloa e le ‘au-popoto, le ‘au-mautofi ma le ‘au-maualuluga, ae fa’aalia i tama-valevale. O se fa’ata’ita’iga, lea lava na ta’ua i le tatou tusi faitau o lenei aso, e foliga mai o mea lilo o tulafono, poloaiga, aiaiga aemaise ai le finagalo o le Atua lea e tu’u-fesili ai le ‘au faresaio ma le ‘au-tusiupu.

Ia malamalama lau susuga i le tu’u fa’atasia e le Alii o tulafono e fa’atatau i ulugalii tete’a, o soifuaga fa’a-enuka aemaise o fanau ua fa’atusa i ai i latou o ē o i le malō o i le lagi. O mea lilo ia o le lagi o lo’o ua tau-a’ao mai e Iesu Keriso. E ao ona malamalama lau susuga i nisi o mea lilo o lo’o natia ma le mafuaga e fa’alilolilo ai e le Atua mai tagata o lenei lalolagi.

### **Fesoasoani mo le Mataupu:**

- E tolu manatu o lo’o aumaia e le tusi faitau, lea ua ta’ua o mea lilo o le Malō.
- O le mea muamua o lo’o tofotofoina ai e le ‘au-faresaio le Alii, o le fa’ate’aina lea o se avā ona o mea uma. O lona lua o le soifuaga fa’a-Enuka o le tagata, ma lona tolu o le fa’atusaina lea e Iesu o tamaiti e pei o i latou o i le malō o i le lagi. O nei mea lilo o tulafono lava ma poloa’iga masani a le Atua, peita’i, ua lilo i ta’ita’i o lotu ma isi tagata, ona ua sesē la latou fa’amamafa i le tulafono.
- O lo’o manino o tulafono ma aiaiga mo le tagata, aiseā e ta’ua ai o mea lilo o le Malō? Ioe, o le Malō lava lea o le Atua ua i a’ao o le tagata, pe afai na te tausia tulafono ma ola ai.
- O tali o nei mataupu e tolu, o lo’o fa’ailoa ai e Iesu o tulafono o le soifuaga e faigofie, tau lava o le fa’alogo ma usita’i pei o se tamaiti. Ia ola fa’alagolago ma talitonu i le Atua, ona iloa lea o mea lilo o le Malō e fa’avavau o le Atua.





Ia aua lava nei ulagia pe tausūai ai se tamaititi ona o tulaga o lo'o soifua ai ma le lē atoatoa o le tino po o le mafaufau. Ia fa'amanatu le tāua o se mea ua lē iloa, ma lagona e lē ana le mea pe ā toe maua.

### **Fesoasoani mo le Mataupu:**

E tolu foi ni manatu o lo'o i le mataupu 18 pei ona fa'atāuaina ai mea fa'atauva'a. O le tali atu a Iesu i ona so'o i le fesili; 'po o ai e sili i le malō o i le lagi? Na fa'atu e Iesu le tamaititi i o latou luma ma fai atu, a lē liua outou, ma avea e pei o le tamaititi, tou te lē sao lava i le malō o i le lagi. Ioe, ua manatu i latou o le avea ma so'o o Iesu ua mautinoa ai lo latou avanoa i le lagi, lea ua fesili po o ai e sili i le malō o i le lagi, ae lē iloa pe o'o i le lagi pe leai. O tagata ia, e tele ina tausūai ai tagata, o isi ia ua ta'ua o e fa'atauva'a i le olaga nei. Peita'i, o le finagalo o le Alii ina ia aua lava nei i ai se tasi e fano, lea ua Ia aumai ai le tala i le mamoe na sē i le fa'ai'uga o le tala.

O tagata fa'atauva'a, ua Ia fa'atusaina i tamaiti ma i latou ua lē atoatoa tino ma mafaufau. O le manatu e leai se tagata e lē tāua i le malō o i le lagi, auā foi na faia e le Atua mea uma lava e o'o foi i le tagata. O lona finagalo ina ia aua ne'i fano se tasi e o'o lava i le tagata fa'atauva'a po o le mamoe na sē ae toe maua mai; o lona fiafiaga tele lea. O le Atua e ou mea uma aemaise le tagata, ina ua sē ma lē iloa ona o le agasala. O lea na toe a'apa mai ai le Atua ma togisala le tagata e ala i lona lava Alo pele e to'atasi. A'o lea ua fesili le 'au-so'o po o ai e sili i le Malō o i lagi.

### **Galuega Faatino:** (Mo le fanau; e mafai ona ave i le fale.)

- Ia tusi mai le tāua o le tala muamua ma le lua, i lo la feso'ota'iina i le mataupu.
- Ia tusi sau laupepa e fa'amatala ai le uiga o le tala lona tolu fa'atatau i le mataupu.

### **Ia malamalama i uiga o upu ma igoa o i le Tusi Faitau:**

- ✓ Fa'amaulalo: lagona ua salamō ma le loto ua alu ifo i lalo.
- ✓ tausūai: pei e ula ma faifai tala i le isi tagata./tiga o isi tagata ona o i tatou ma a tatou mea e fai po o aga foi.
- ✓ Fa'atauva'a: o se mea la'ititi ma ua lē amanaiaina, po o se mea ua tu'ulafoa'iina foi.

**Tauloto:** *Mataio 18:3 - 4; "E moni, ou te fai atu iā te outou, a lē liua outou, ma avea ia pei o tamaiti, tou te lē sao lava i le malō o i le lagi. O lenei o sē fa'amaulalo o ia iā te ia e pei o le tamaititi nei, e sili lea i le malō o le lagi."*

### **A'oa'oga:**

- ❖ Aua le fia mata muamua, ae uma ane e pito i tua.
- ❖ Ia amanaia ma fa'atāuaina tagata uma i lou olaga.





**Tauloto: Mataio 18:21/22.** “Ona alu ane ai lea o Peteru iā te ia, ua fa’apea ane, “Le Alii e, e agaleaga mai fa’afia ea lo’u uso iā te a’u, ma ou fa’amagalo iā te ia? Se’ia atu fitu ea?” Ua fetalai atu Iesu, “Ou te lē fai atu iā te oe, se’ia atu fitu, a ia fitugafulu ni fitu. / 27 “Ona mutimuti vale ai lea o le alofa o le alii i lea auauna, ua tu’u atu o ia ia sa’oloto, ma fa’amagalo atu ana tupe ua i ai.”

### **Fesoasoani mo le Mataupu:**

O lo’o fa’ailoa e le Alii i ona so’o aemaise le ‘au Iutaia ma tagata uma, le autū o lana galuega o le fa’aolataga na tu’ua ai le malō o i le lagi, ina ia fa’amagalo le lalolagi atoa. Ia malamalama le fanau i le ola fa’amagalo atu e faigatā, ae suamalie pe ā uma ona e ofoina. E lē tau tulia foi ina ia i ai se numera mo au fa’amagaloga, pei ona fetalai atu le Alii iā Peteru. Aua foi nei fiu e fa’amagalo ni sesē o isi tagata ua iā te oe, ia e faia e pei ona e mana’o e fai mai e isi tagata iā te oe. Ia maua le loto salamō ma ia mutimutivale le alofa e fa’apalepale ai lou agalelei i isi ou uso.

Ia manatua foi, pau lava lea o le fa’amagaloga e magalo lelei ma mamā atoatoa ai agasala a le lalolagi, e ala i lona maliu ma lona toe soifua manumalō mai le oti ma le tu’ugamau. A ia maua pea le loto fa’amagalo atu o le tagata i isi ona uso, i lo latou va feagai ai i lea aso ma lea aso. Ia manino le fanau o le mafuaga tonu lea na tu’ua ai e Iesu Keriso le malō o lona Tamā, ae afio mai i le lalolagi ina ia magalo le tagata agasala.

**Galuega Faatino:** Ia tali mai i se afa laupepa fesili ia, e lelei foi nisi fesili e te saunia pe afai e lava le taimi.

1. Aiseā na sau ai fua Iesu e fa’amagalo agasala a le lalolagi, ae leai sana sala?
2. O le ā le uiga o le tali atu a Iesu iā Peteru, ia fa’a-fitu gāfulu ni fitu ona fa’amagalo atu?

### **Ia malamalama i uiga o upu ma igoa o i le Tusi Faitau:**

- ✓ mutimuti vale: ua fa’a-teleina le alofa
- ✓ fa’amagalo: ua e tu’u atu le tasi tagata ia sa’oloto ma fa’amamā ana agasala.
- ✓ tenari: o le tupe eleni na fa’aaoga i le vaitau o le Alii.
- ✓ atu fitu/fitu gāfulu ni fitu: fa’a-fitu ona fai / fa’a- fa-selau iva sefulu ona faia.

### **A’oa’oga:**

- ❖ Ia fiafia e faamagalo atu isi tagata, ona faamagaloina foi lea o oe e le Atua.
- ❖ Ia manatu i le tāua o le fa’amagaloga na saunia e le Atua mo le tagata agasala e ala i lona Alo pele e to’atasi.
- ❖ Aua le fiafia e fai le agasala ae musu e fa’amagalo atu.



**APERILA 05, 2020**

**‘ASO SA LAUPAMA’**

**MATAUPU 08:** “Ulufale manumalō fa’alē-ilogā.” (An odd sort of triumphal entry.)

**TUSI FAITAU:** Mataio: 21: 1 - 11

**SINI:** Ia iloa e le fanau le tāua o le malaga fa’atupu a le Alii i lona nu’u moni, peita’i, e le’i fa’atāuaina e ona lava tagata.

**Fesoasoani mo faiaoga:**

O le tala masani i le malaga fa’atupu a Iesu i Ierusalemā, peita’i, na fa’alē-ilogā pei o manatu o le mataupu. Ia taumafai e ave mafaufau o le fanau i tupu o lenei vaitau, pe fa’amanatu itu-aiga malaga fa’a-tupu fa’apenei ua masani ai malō tetele o le lalolagi. Ia fa’amalamalama i le fanau le uiga moni o le malaga fa’a-tupu, e ‘ese foi le mamalu ma le matagofie i le matamata. Ia tau fa’atusa i ai le mea lea ua fai e le lalolagi i le tupu o le lagi.

**Tauloto:** *Mataio 21: 9 “Osana i le Alo o Tavita; ia manuia le afio mai i le suafa o le Alii. Osana i mea e aupito i luga.”*

**Fesoasoani mo le Mataupu:**

O le tala masani o lo’o molimau i ai le ‘au-Sinopi, e i ai lava nai ‘ese’ese ae manaia tele le va’aiga a Mataio. Ta ofo fo’i pe ā le iloa e le vasega matutua lenei tala. O nai mea e fia fa’amamafa o lenei tala logologoā; 1. O le malaga fa’a-lē iloga a le Alii i Ierusalemā. 2. O le uiga o le tali a Iesu mo le avea’i i le asini; ‘e mana’o i ai le Alii.’ 3. Fa’ato’a vevesi tagata ina ua taunu’u atu le Alii i lona laumua, a ua fesili nisi po o ai lenei? Ua tali atu nisi o Iesu lenei le perofeta mai Nasareta i Kalilaia.

**Galuega Faatino:**

- Ia fa’ata’ita’i ona fa’a-ata le malaga fa’atupu, (Iesu ua ti’eti’e i luga o le tama’i asini) ae alalaga isi tamaiti i upu ua fai ma tatou tauloto.
- Ia fai sau tala i se malaga fa’a-tupu a se tasi o tupu o lenei lalolagi na e matamata i ai.

**Ia malamalama i uiga o upu ma igoa o i le Tusi Faitau:**

- ✓ osana: fa’aola mai.
- ✓ agamalū: aga maulalo po o le loto maulalo.
- ✓ mea aupito i luga: mea silisili po o mea pito i sili ma lelei.
- ✓ ‘e mana’o i ai le Alii:’ e ao ona tatala mai auā o lo’o finagalo i ai le Alii.

**A’oa’oga:**







### **Fesoasoani mo faiaoga:**

Ia maua se iloa fa'a-tagata faigaluega e tau malamalama ai le tala. Peita'i, e 'ese'ese lagona fa'ale-tagata ma le silafaga a le Atua. E fua le tau o le tagata galue i le tovine i le pule faitalia a le matai o le galuega. Ia ave'ese i fanau le galulue mo se tau, ae galulue fa'amaoni o lo'o silasila le Atua o Lē na vala'uina so'o se tagata i galuega ua tofia ai.

**Tauloto:** *Mataio 20: 14-16 “Inā tago ia i lau mea, ma alu; o la'u pule lea e avatu lava i lenei na mulimuli e pei o ā oe lava. E lē faitalia ea a'u ona pule i a'u lava mea? E te fa'aūū mai ea ina ua ou agalelei? E fa'apea ona muamua o e na mulimuli, e mulimuli foi e na muamua.”*

### **Fesoasoani mo le Mataupu:**

O lo'o manino le tala e fa'atatau i le Atua ma le 'au-galulue i le tovine, tele galuega a ua itiiti le 'au-faigaluega. Ua tele foi tagata ua leai ni mea e fai, na ona tutū ma feoa'i solo, nisi ua tau fa'atonu e galulue ma nisi ua leai lava se fia ola galulue. O le galuega po o le olaga e pule aoao le Atua, Lē Matai o le galuega i le tau o le tagata galue. Tau o lenei, ia galulue punoua'i ma aua le fa'atitilo mo se tau po o se totogi o le galuega. O le matāfaioi tausi lenā a le Matai o le galuega.

Ia tatou iloa e ta'i kuata ma asiasi mai le Matai o le galuega i lana tovine, o lona uiga e lē o nofonofo le Atua ae galue ma fautua mai pea i o tatou olaga galulue. A lelei ona fai se galuega ua tutusa ai le aso e tasi ma le tele o tausaga pei o upu a le fai salamo. O i'inā foi e malie ai le tagata galue i le tau a ona lava lima, o le totogi foi e fa'avavau lea.

### **Galuega Fa'atino: Galue i le fesili ma mafaufau loloto i lona uiga fa'ale-agaga mai le tala**

- Afai e galue Simi mo le itula i le \$5.78 e fia lona tau i le lua vaiaso (80hrs.)? A'o le ā foi le 'ese'esega ma Paulo na galue na o le 63itula i le totogi lava e tasi?
- Taumafai e tata'i 'ese manatu o le fanau mai le upu lē 'fetaui' o totogi i manatu fa'a-tagata.

### **Ia malamalama i uiga o upu ma igoa o i le Tusi Faitau:**

- ✓ faitalia: pule sa'oloto i se mea e fai.
- ✓ alausu: vave ala i luga alu loa.
- ✓ agaleaga: o se aga po o se amio ua lē lelei a ua leaga.
- ✓ muimui: o le tagata ua tomumu po o le fai tala e uiga i se mea ua lē fiafia ai.



**MANATU MO ME: “AUA LE FEFE.” (DO NOT BE AFRAID)**

**ME 03, 2020**

**MATAUPU 11:** “A i ai Iesu i le va’a, ou te ‘ata i le afā.”  
(With Christ in the vessel... I Smile at the storm.)

**TUSI FAITAU:** Mataio- 8: 18 - 27

**SINI:** Ia iloa e le fanau e lē tatau ona fefefe auā o lo’o faimalaga fa’atasi ma le ta’ita’i malaga, o Lē e fa’alogo ma usita’i i ai le afā ma le vai.

**Fesoasoani mo faiaoga:**

E lā faigofie le avea ma so’o, ia manino lea lagona i le fanau. Auā e ao ona tu’ua mea uma, o lou aiga, o le tamāoaiga, e o’o lava i e ua feoti. Afai o le ā e mulimuli i le Alii e avea ma so’o, e ao ona e lafoa’i mea uma o le olaga nei, tu’ua lou tagata tuai ae mulimuli atu iā te ia. O lau ‘aupega e te tau ai; o lou fa’atuatua ia lava ma totoe. Ia manino lea manatu i le fanau, ‘o le avea ma so’o moni e lē o se tofi faigofie. Peita’i, e ui ina faigatā le olaga nei e fa’alologo lava mea uma i le Alii o le Toe Tu. Ioe, ta’u i le fanau e mafai foi e so’o se tagata ona vavao ma taofia matagi pe afai e lava le fa’atuatua i le Keriso Toe Tu.

E fa’apefea ona fa’amatala lenā tulaga? Ia lelei ona e fa’amalamalama le uiga o le talitonu ma le fa’atuatua i le fanau. Ia fa’amanatu i le fanau afai ua faimalaga, ia alu ma lou mautinoa o lo’o i ai fa’atasi ma le Alii i le faigamalaga. O ai la se vaivai le loto o lo’o malaga fa’atasi ma le ta’ita’i malaga o le vasa? E tatau ona fa’atupuina atili le fa’atuatua ma le talitonu o le tagata malaga.

**Tauloto:** *Mataio 8:20 “Ona fetalai atu ai lea o Iesu iā te ia, “E fai lua o alope, e fai foi mea e momoe ai manu felelei; a o le Atalii o le tagata, e leai se mea e moe ai o ia.”*

**Fesoasoani mo le Mataupu:**

Ua o’o lava i faresaio ua fia avea ma so’o o Iesu, peita’i, e tele mea o le lalolagi aemaise le tamāoaiga ua taofia ai i latou mai le mulimulita’i i le Alii. Ia manatua foi e tusa lava po o le i ai o Iesu i le faiga-malaga e tofotofoina lava le tagata malaga. Aua le avea le tele o mea o le olaga nei e taofia ai oe e o atu i le isi itu o le vai ma Iesu, e pei ona vala’auina ai i tatou uma. O lea lava na fetalai Iesu, tu’u tagata oti e tanu e o latou tagata oti. Ia mautinoa e leai se mea e moe ai le Alii, peita’i, e saunia e le Atua mea uma mo le tagata malaga e tumau le fa’atuatua i le ta’ita’i malaga.

**Galuega Fa’atino: Fa’atalatalanoaga i fesili**

- Fesili i le fanau po’o le a le uiga o le avea ma so’o o le Alii? ( Fa’atalanoa le fesili lea)
- Ia fa’atalanoa le fanau po o ai e lava lona fa’atuatua e mafai ai ona faia se vavega.



### **Fesoasoani mo Faiaoga:**

O lo’o i lau Susuga lava le fa’atautaiga o lau tapenaga mo le mataupu. O le fautuaga lava ia lava le mafuta i le tusi faitau, o le ā ‘oa ai le matupu mo tamaiti. Manatua o fanau ia, ua tataua lava ona telē se taimi e fa’atalanoa ai le matupu ma fa’aali mai o latou lagona ma manatu, i le fa’auigaina o le tala, ae fa’asa’osa’o e lau Susuga fa’amolemole o latou manatu. Aua le fa’aleaogaina o latou manatu, ae ia malamalama i latou. Ia fa’amamafa le soifua tatalo, aemaise le fa’atāuaina o le tofi o tinā i totonu o aiga. Manuia le tapenaga.

**Tauloto:** *Luka 2: 34-35 “Fa’auta, ua tu’u le tama nei e pau’u ai ma toe tutū ai tagata e to’atele o i Isaraelu; e fai foi ma fa’ailoga e ta’uleagaina; e tu’ia foi lou lava loto ia ati i le pelu-ina ia fa’aalia mai ai manatu o tagata e to’atele.”*

### **Fesoasoani mo le Mataupu:**

O le soifua ua ofoina ma faatalitali i le Atua mo lana faasinomaga. E pei o le toeina o Simeona na faatalitali ona o le tautoga e lē o’o i ai le oti se’ia sapaia le Keriso. Ua faapea foi le loomatua o Ana, ua nofo i le malumalu ma ua ola i le anapogi ma le tatalo i le ao ma le po. Ia faamanatu i le fanau le soifua ua matutua ma ua ola to’atasi e lē faigofie, peita’i ua mautinoa e le loomatua o Ana le tausiga a leAtua ia te ia i aso o totoe o lona soifua. Ua ai ma inu i le tatalo ma le anapogi i le autū ma le pogai o le ola e maua ai lona malosi.

### **Galuega Fa’atino: Fetufa’aiga ma tamaiti**

- Fetufaa’i ma le fanau i ni o latou manatu i le uiga o fuaiupu o lo’o fai ma tauloto.
- Ia a’o ia matuā maua le tauloto lenā, ma fa’amalosia i tamaiti ia manatunatu i lona tāua.

### **Ia malamalama i uiga o upu ma igoa o i le Tusi Faitau:**

- ✓ toeaina: tamā ua loa le soifua po ua ova ma le 60 tausaga o le olaga.
- ✓ Lo’omatua: teine ua umi le ola ma ua ova ma le 60 tausaga o le olaga.
- ✓ ulugā manutagi: o manutagi e sili ona lelei e osi ai taulaga.
- ✓ Fa’amamāina: tulafono fa’a-Isaraelu mo le tama tane e fa’amamā pe a atoa tausaga e valu. (peritomeina)

### **A’oa’oga:**

- ❖ Ia ola fa’atalitali i le Atua ae a tofi ma tiute aemaise o fa’amanuiaga.
- ❖ E tausia lava e le Atua i latou ua matutua i le fe’au ma lana galuega.
- ❖ E fa’afogaina e le Atua le tagata e ola tatalo ma fa’amanuia iā te ia.
- ❖ E fa’afogaina foi e le Atua le tagata e soifua anapogi ma ole atu iā te Ia.













**MATAUPU 16:** “E maua le tasi i le tulafono.” (Atonement under the law.)  
**TUSI FAITAU:** Levitiko 16: 1-10 / 29 - 34  
**SINI:** Ia iloa e le fanau le ola faitaulaga na fa’atonuina ai Isaraelu, lea ua o’o mai lava i o tatou taimi ua togisala Iesu mo a tatou agasala.

**Fesoasoani mo faiaoga:**

O le soifua fai taulaga o le Isaraelu i le tau-amata mai o le nu’u filifilia o le Atua. E mafai lava ona fa’amatala le faiga taulaga pei ona tusia i le tusi faitau. O lea ua o’o mai i lenei vaitau o lo’o ua sui lava faiga ae tumau fa’avae. Pau le mea na suia e le Atua ona ua feoti ai atalii e to’alua o Arona, o lea na taofia ai e Mose ona toe o’o ane lona uso i le mea pa’ia. O lea ua suia ma ua fa’aali ai le Atua i le ao i luga a’e o le nofoa o le alofa. O lea lava na suia e Iesu Keriso le ‘*nofoa o le alofa*’ i lona toto ma lona tino na osi a’i e le Atua le taulaga mo agasala a le lalolagi.

**Tauloto:** *Levitiko 16: 2 “Ua fetalai mai le Alii ia Mose, ina fai ane ia ia Arona lou uso, aua ne’i ulufale o ia i aso faisoo i le mea paia i tala atu o le ie puipui, i luma o le nofoa o le alofa ua i luga o le atolaau ina ne’i oti ai o ia, auā e faaali a’u i le ao i luga ae o le nofoa o le alofa.*

**Fesoasoani mo le Mataupu:**

O le tala lena o le faiga taulaga a’o tauafuafua mai i augā tamā o le nu’u o le Atua. E ao lava ona faataunu’u le osiga taulaga i le tamaoiga ua maua mo le galuega a le Atua. A’o le taulaga o le togiola ma le faamagaloga o agasala; ia manino le fanau ua mae’a tapena e le Atua e ala i lona lava Alo pele e toatasi. O le tala i le faaolataga a le Atua ua na suia ai le taulaga i luga o le nofoa o le alofa i lona lava atalii o Iesu Keriso.

**Galuega Faatino:** Fa’atalatalanoaga.

- Ia fa’atalatalanoa le fanau, i so latou lagona i faigataulaga a le Ekalesia, e pei ona faia i tausaga uma. O le ā so latou taofi?
- Ia matuā fa’amalosi lau Susuga i fanau ina ia amata ona fa’amasani i le ola faitaulaga ma fiafia e foa’i mo le galuega a le Atua.

**Ia malamalama i uiga o upu ma igoa o i le Tusi Faitau:**

- ✓ fale fetāfa’i: o le malumalu tapua’i lea o le nu’u e fe’avea’i.
- ✓ Ato la’au: o le ato la’au lea a Isaraelu e tau’ave e fa’amanatu ai le auai ane o le Atua.
- ✓ punitia: ua tapunia po ua poloka mai i se mea ma ua lē sao atu ai.

**A’oa’oga:**

- ❖ Ia manatua fai sau taulaga i le Atua i aso fai so’o.





## SUEGA O LE AFA TAUSAGA

TUSI FAITAU: TUSI UMA NA FAITAUINA MAI LE AMATAGA.

### Fesoasoani mo faiaoga:

**E ta'i lua fesili mai mataupu ta'itasi, amata mai le mataupu 1 e o'o i le mataupu 17.**

**Fesili ma Tali** (E fautuaina le saunia lelei o fesili i pepa, ma tufa i tamaiti e su'e ai le su'ega lea).

1. Aiseā e vivi'i ai le tagata i le Atua? *T:* Ona o lona alofa ua sili lava lea mo le tagata.
2. O ai lea e fa'ataatai i ai 'upu' a le fai-salamo? *T:* O le Atua lava.
3. O ai le tupu o Peresia na feagai ma le toe a'e o le tafeaga? *T:* O Kuresa.
4. O le ā foi le afioga a le Atua na faia e le tupu? *T:* Ia faia se fale mona i Iuta.
5. O ai na tusi i ai alofa'aga ma mo'omo'oga lelei o Paulo? *T:* Na tusi i le 'au-paia, o tiakono ma i latou uma o le 'au-faigaluega na latou galulue fa'atasi i le Talalelei.
6. O le ā tonu le uiga o le mataupu a Paulo. *T:* E lē tāua lou tulaga a'o lau galuega mo le Talalelei e sili lea ona taulia.
7. O le ā le tali atu a Iesu i le fesili tofotofo ane a le 'au faresaio, 'pe fa'ate'a ea le avā ona o mea uma? *T:* Fetalai le Alii o ē ua tu'u fa'atasia e le Atua, aua ne'i fa'ate'aina e se tagata.
8. O le ā le tala a Iesu e fa'ataatai i tamaiti? *T:* Auā e fa'apei o i latou nei i le malō o i lagi.
9. O le ā le tali atu a Iesu i le fesili a ona so'o, po o ai e sili i le malō o le lagi? *T:* O lenei o se fa'amaulalo o ia iā te ia e pei o le tamaiti nei, e sili lea i le malō o le lagi.
10. O le ā le finagalo o le Atua i e fa'atauva'a? *T:* E lē finagalo le Atua e fano sē fa'atauva'a.
11. O ai so'o na ave e Iesu i lona feliu'iina? *T:* O Peteru, Iakopo ma Ioane lona uso.
12. O le ā le si'ufofoga mai le ao? *T:* O lo'u atalii pele lenā ou te fiafia iā te ia.
13. A'o le ā le tali atu a le Alii i le ola fa'amagalo? *T:* Ia fa'a-fitugāfulu ni fitu.
14. O le ā le mea na faia e le alii i le auauna ina ua fa'apaū ma ifo, ina ia fa'apalepale iā te ia? *T:* Ua mutimuti vale le alofa o le alii i le auauna ma tu'u atu o ia ia sa'oloto ma fa'amagalo.
15. Aiseā ua ta'ua ai le Aso Sa o le malaga fatupu a Iesu I Ierusalem, o le Aso Laupama? *T:* Auā o lā o le Pama na fa'aaoga e fola ai le ala ma talotalo ai tagata i le Alii.
16. Na talia e le 'au Iutaia Iesu? *T:* E leai e taunu'u atu a'o vevesi tagata fai mai, po o ai tagata?
17. O ai na ala-usu i le tu'ugamau i le taeao o le toetu? *T:* Na o le to'alua fafine, o Maria le Makatala ma le isi Maria e pei o le molimau a Mataio.
18. O le ā le fa'atonuga a Iesu na fai i tinā nei? *T:* Inā o atu ia, ma ta'u atu i o'u uso, ina ia





**Tautua Printing Press**  
**Congregational Christian Church of American Samoa**  
1 Kanana Fou Street, Box 1537  
Pago Pago, American Samoa 96799  
[www.efkasonline.org](http://www.efkasonline.org)